



¿Jukarijtsi úrasini  
selularini?



Vol. 3, núm. 2 2021 PURÉPECHA

Rebista mámaru jási formatu jimbo: 68,097,000  
Jarhasti 208 idiomecha jimbo

Awake! is published quarterly by Watchtower Bible and Tract Society of New York, Inc.  
© 2021 Watch Tower Bible and Tract Society of Pennsylvania.

Para MÉXICO KA CENTROAMÉRICA  
Congregación Cristiana  
de los Testigos de Jehová, A.R.  
Apartado Postal 895  
06002 Ciudad de México  
México

Exentaakajtsi lista ma iámindu  
direksionicha jingoni ixú  
[www.jw.org/tsz/nena-karani-o-uandani](http://www.jw.org/tsz/nena-karani-o-uandani).



¿Uékasintsí míteni sánderu ambe o  
parajtsí gratisi jorhenguahini Biblieri  
ambe chaari k'umanchikuarhu?

Exe je [www.jw.org/tsz](http://www.jw.org/tsz)

o karachejtsini je ma indeni  
direksionicha jimbo engaksí  
karhakua jaka.

Ari publikasioni jindeesti para jorhenguahini Biblieri ambe, ka ánkikuarhita máesti enga úkuarhejka iámindu parhakpinirhu, jarhuatakuarhiparini imani sentabuni jimbo engaksí k'uiripuecha intspijka tsipikua jingoni. I publikasioni no ataranhantásindi. Engajtsí uéjka intspini sáni sentabu, exe je pájinani [donate.jw.org](http://donate.jw.org). Enga no karakata jauaka máteru ambe, tekstuecha karakata griegaecheri pitakataksí jarhasti Bibliarhu *Jimbari Eiatsperakua Tata Jesukristueri* (iási anapu karantskatani jimbo). Tekstuecha karakata ebraeocheri p'itakataksí jarhasti ixú *La Biblia. Traducción del Nuevo Mundo TNM*, 2019 utusí jimbo.

¿Jukarijtsi úrasini selularini?\* Uánikuechaksí eratsesíndi eskaksí sési úrasínga selularini ka eskaksí no jukari úraasínga aparatuechani. Peru selulari, sánhani arhisíndi no sési útspini ka k'uiripuechaksí no jamberi kuenta íntskukuarhesíndi.

\* Nájkirukachi ini rebista jimbo selulariri ambe uandani jauaka, ístu jindeesti para tabletecha, komputadorecha ka máteru i jási ambe.

## **NÉNA NO SÉSI ÚKUSĪNI SELULARI:**

- 
- 4 Na engajtsí pájperajka máteruecha jingoni

---

  - 7 Chaari sapiichani

---

  - 10 Chaari temungurhirikuani

---

  - 13 Chaari eratsekuani

---



NÉNA NO SÉSI ÚKUSĨNI SELULARI

# NA ENGAJTSĨ PÁJPERAJKA MÁTERUECHA JINGONI

Íási, k'uiripuechaksĩ úsindi uandontskuarheni máteruecha jingoni nájkirukaksĩ íauanichani jauaka mensaji jimbo, korreu elektroniku, bideoiamada ka redesi sosialicha jimbo. I ambe xarhatasĩndi eska selulari kánikua marhuasĩnga. Joperu, k'uiripuecha engaksĩ sánderu selularini úrajka para uandontskuarheni amigu jémbeechea jingoni, uatiksĩ arini ambe úkuarhinchani:

- No xáni kurhangukuani amigu jémbeecheani.
- Jandiajkuksĩ p'ikuarherani ka eskaksĩ kueratanchasĩnga ambe ma.
- Sánderu jandiajku pendiente pákuarhini ka eska máteruecha jimbo.





## AMBE ENGAJTSÍ JATSIKA PARA MÍTENI

### KURHANGUTSPINI

Para úni kurhangutspini, uétarhisíndi eskachi eratsentaaka na enga p'ikuarherajka máteru k'uiripu. Peruchi no uaaka ini ambe úni engachi sánderu arhiska mensajichani axatspiani ka publikasionichani arhiantani engaksí redesi sosialicharhu jaka.

Tiempu jingoni, engajtsí sánderu úraska selularini, níaraakajtsí xáni uánikua mensajichani jatsiani engajtsí nóteru jamberi uaakia chaari amiguechani mókukuantani ka jamberijtsí nóteru kuenta íntskukuarheni eska chaari amigu ma uétarhinchaxaka eskajtsí jarhuataaka.

**ERATSI JE ARINI AMBE:** Engajtsí axakuauaka mensaji ambe chaari amiguechani, ¿néajtsí uaa xarhatakuani eskajtsí kurhangukuasínga? (1 PEDRU 3:8).

### JANDIAJKU P'IKUARHERANI

Inbestigadorichaksí exespti eskaksí uánikua k'uiripuecha no sési p'ikuarheraspka ísí tátsekua engaksí na úrapkia redesi sosialini ma enga kánikua mítekateka. Inbestigadorichaksí uandaspti eska exeani fotuechani ka arhintani ambe engaksí máteru k'uiripuecha újka, “úsín[ga] eskachi jucha ísí p'ikuarheraaka eskachi no jukaparhakua ambe úxaka”.

Engachi exeajka fotuechani engaksí xarhatajka na engaksí xáni sési nitamakuarhijka máteruecha, as-tachi úpiringa terukukuarhintani imeecha jingoni ka eratseni eskachi no ísí tsípikuarhisínga eska imeecha.

**ERATSI JE ARINI AMBE:** ¿Ambeksíni jarhuataa parajtsí no jámani terukukuarhintani máteruecha jingoni engajtsí redesi sosialicharhu inchaaka? (GALASIA 6:4).

### JANDIAJKU PENDIENTI PÁKUARHINI

Maestra ma uandaspti eskaksí máru imeeri es-tudianticha, imeecha jingontkuksí kúnguarhisínga engaksí újka ambe ma imeechani jimbo ka engaksí kuájpiajka.\* I járhati k'uiripuechaksí imani ambejkuksí jirinhajti ambe engaksí máteruecha uaaka íntsaani imeechani. Ísí jimbo, nema úpirindi ueenani ísí exeani amiguechani komueska selulari ma, enga uaaka úrani na enga jatini ima uékaaka.

**ERATSI JE ARINI AMBE:** Ambe engajtsí karhatajka internetirhu, ¿xarhatasíni eskajtsí tsitisinga máteruecha jingoni andaperani ka chájkumindu pendiente pákuarhini? (GALASIA 5:26).

\* Ísí arhisíndi librruhu *En defensa de la conversación*.

## AMBE ENGAJTSĪ UAAKA ÚNI

### ERATSĪ JE NA ENGAJTSĪ ÚRAJKA SELULARINI

Engajtsĭ sĕsĭ úraska selularini, jarhuataatiks-  
ĩni parajtsĭ uandontskuarheni chaari amigue-  
cha jingoni ka parajtsĭ jamberi sánderu sĕsĭ  
pájperani imeecha jingoni.

**BIBLIERI KARAKATA:** “Ima enga uékpíjka [...] no uékasĩndi imeeri ambejku”

(1 KORINTU 13:4, 5).

**Markari je náki konsejuntsĭ uékapirini úni o  
kara je ambe engajtsĭ uékapiringa úni:**

- ☐ Jánguarhintani meru k’uiripu  
jingoni uandontskuarheni enbesi de  
mensajichani axakuani selulari jimbo o  
korreu elektroniku jimbo.
- ☐ Engani máteru nema jingoni  
uandontskuarheni jauaka, máekandu  
peeraaka telefonuni o jima peerakuni  
paraka no kúskaaka.
- ☐ Nóteru xáni tiempu úrani redesi  
sosalicharhu.
- ☐ Jorhengarhini máteruechani  
kurhajchaani.
- ☐ Uandajpani amiguni ma enga no sĕsĭ  
nitamakuarhini jaka.
- ☐ \_\_\_\_\_
- ☐ \_\_\_\_\_
- ☐ \_\_\_\_\_

## KURHAMARHIKUARI JE:

- ¿Jatsiaski amiguechani engaksĭ meru uanda-  
nhiajka jĩndeni jimbo ka jĩjtuni uandanhiasĩni  
imeechani jimbo?
- ¿Namuni xanhari uandajpanhasĩni o mensa-  
ji ma axaminhani engani juchiiti amiguecha jin-  
goni uandontskuarheni jarhajka?
- Engani karhataajka redesi sosialicharhu fo-  
tuechani o engani karajka ambe ma, ¿xarhata-  
sĩni ima ambe eskani jĩjkumindu pendiente pá-  
kuarhisĩnga?
- ¿Nĕna p’ikuarherasĩni engani na úrajkia redesi  
sosiali ma?
- ¿Ambe uaa úni parakarini selulari o máteru  
aparatu elektroniku no ójkutaaka parani meru  
ambakiti amiguechani jatsiani?

**BIBLIERI KARAKATA:** “Ka no solu pendiente páni  
para chájkumindu sĕsĭ uérani, sino ístu pendiente  
páni para máteruecha” (FILIPUSA 2:4).

“Para ma úni amiguechani jatsiani uétarhi-  
sĩndi tiempu ka jánguarhintani. Ísĭ jimbo,  
no uétarhisĩndi uánikua amiguechani ja-  
tsiani, sino eskaksĭ ambakiti amiguecheua-  
ka. Inde járhati amiguechaksĭ uékasĩndi es-  
kakeni sĕsĭ nicheaka ka t’ujturi májkueni  
ambe uékasĩnga para imeecha”.



EMILY

NÉNA NO SÉSI ÚKUSĪNI SELULARI

# CHAARI SAPIICHANI

Sapiichaksī kánikua jorhenasti selularini úrani ka programechani, joperu k'ératichaksī úkua jukanchasīndi indeni ambe úrani.

Máruksī exesti eska ima tumbiicha engaksī kánikua úrajka internetini, arini problemechaksī jatsiasīnga:

- Nóksī úsīndi jurajkuni selularini o aparakuechani.
- Úsīndiksī eskaksī no sési kánhaaka máteruecha interneti jimbo o eskaksī imeecha no sési kánhaaka.
- Úpirindikī pornografia ambe exeni, ia sea engaksī meru jirinhantaaka o nómbe.







## AMBE ENGAJTSĪ JATSIKA PARA MĪTENI

### NO ÚNI JURAJKUNI SELULARINI

Máru ambe enga internetirhu jaka, úsindi eska ma méntku uékani jauaka úrani, komu pori ejemplu ch'anakuechani engaksĭ interneti jimboeka. ¿Andisĭ ísĭ úkuarhijki? Libru *En defensa de la conversaci3n* uandasĭndi: “Aplikasionichaksĭ úkata jarhasti para ma sánderu indenĭ ambe úrani jarhani”. Empre-sechaksĭ sánderu sentabu andasĭndi engachi jucha sánderu tiempu úrajka imani aplikasionichani jimbo engaksĭ imeecheri anunsieucha uérajka.

**ERATSI JE ARINI AMBE:** ¿P'indeskiksĭ chaari sapiicha méntku úrani jarhani selularini? ¿Nénajtsĭ uaa jarhuataani parakaksĭ sánderu sési úraaka imeecheri tiempuni? (EFESU 5:15, 16).

### NO SÉSI AMBE ÚMINHANI INTERNETI JIMBO

Máru k'uiripuechaksĭ sánderu no sési jámasĭndi, no sési uandani ka sóntku ikiani engaksĭ internetini úrajka. Ka i ambe úsindi eskaksĭ *no sési káuaka* má-teruechani.

Máru k'uiripuechaksĭ ísĭ jámasĭndi jimbokaksĭ uéka-sĭnga mĭtekateni. Ka máteruechaksĭ eratsesĭndi eskaksĭ *no sési kánhasĭnga* engaksĭ no p'imarhi-

nhajka para úni ambe ma, pori ejemplu, engaksĭ no p'imarhinhajka k'uínchikuarhu ma.

**ERATSI JE ARINI AMBE:** Engaksĭ chaari sapiicha internetini úrani jarhajka, ¿no sésiksĭ kaasĭni máteruechani? (Efesu 4:31). ¿Nénaksĭ p'ikuarherasĭni engaksĭ no p'imarhinhajka paraksĭ úni ambe ma máteruecha jingoni?

### PORNOGRAFIA

Interneti jimbo, íasĭ sánderu fásilistia pornografia ambe exeni. Ka nájkirukaksĭ jaka programecha parakaksĭ sapiicha no exeaka indenĭ ambe, ménichanisĭ i ambe no xáni marhuasĭndi.

Selulari jimbo axaani o axaminhaani imajenichani engaksĭ seksueri ambe xarhatajka, uaati delitu máeni. Ka ménichanisĭ, tumbiicha engaksĭ i járhati imajenichani axaajka, úpirindikĭsĭ arinhani eskaksĭ pornografia infantilĭ etsakuxaka seguni na engaksĭ xáni jatiriuaka ka ambe engaksĭ uandajka jima ana-pu leicha engaksĭ irekaka.

**ERATSI JE ARINI AMBE:** ¿Nénajtsĭ uaa jarhuatani chaari sapini paraka no jámaaka exeni o axaani imajenichani interneti jimbo engaksĭ seksueri ambe xarhatajka? (EFESU 5:3, 4).



## AMBE ENGAJTSĪ UAAKA ÚNI

### JORHENDAA JE CHAARI SAPIICHANI

Nájkirukaksĭ sapiicha no úkua jukanchajka selularini úrani, uétarhinchasĭndiksĭ eska nema arhistakuauaka. Libro ma uandasĭndi eska kánikua peligrosueska jurajkuani sapiichani paraksĭ úrani selularini o internetini engaksĭ nótki jorhendanhani jauaka néna sési úrani.

**BIBLIERI KARAKATA:** “Jorhenda sapini náki jindeeski ambakiti xanharu, nájkiruka jatiri-uakia no jurajkuati indeni xanharuni”

(PROVERBIOS 22:6).

**Markari je náki konsejuntsĭ uékapirini úni o kara je ambe engajtsĭ uékapiringa úni:**

- ☐ Arhini juchiiti sapini eska no no sési kámpiaka enga internetini úraaka.
- ☐ Jarhuatani juchiiti sapini para no no sési p'ikuarherani engaksĭ máteruecha no p'imarhiaka paraka uaaka ambe ma imeecha jingoni.
- ☐ Úni ambe enga xáni uétarhiaka paraka juchiiti sapi no exeaka no sési jáśi ambe.
- ☐ Someni exeni jarhani néna enga úrani jaka selularini.
- ☐ Arhini na enga xántku tiempu uaaka úrani selularini pauani pauani.
- ☐ No járhritani eska chúrikuechani imeeri kuarturhu jatsiaka selularini.
- ☐ No sésikua íntspini para selularini úrani enga t'irenhani jauaka.
- ☐ \_\_\_\_\_
- ☐ \_\_\_\_\_
- ☐ \_\_\_\_\_

## KURHAMARHIKUECHA PARAKSĪ TAATICHA MÁJKU K'ÉRI UANDONTSKUARHENI

- ¿Úrasĭnchi selularini o máteru aparatu ambe parachi jucha nóteru exeni jarhani juchaari sapini?
- ¿Uétarhinchasĭni juchaari sapi selulari ma enga interneti jatsiaka? ¿Andi?
- ¿Sési japirini íntskuni aparatu elektroniku ma interneti jingoni?
- ¿Jorhenaski p'íngukuarhini?
- ¿Néna xarhataskia eska responsabliska imani ambe jingoni enga újka?
- ¿Ambe ka ambechi uaa juramukuni eska uaaka?
- ¿Ambechi uaa úni paraka juchaari sapi máteru ambe uaaka ka eska no chúskuaka selularini úrani?

**BIBLIERI KARAKATA:** “Imeecha engaksĭ eratsekua jukaka [...] p'índes[tiksĭa] eratseni paraksĭ úni míteni ambe enga jindeeka ambakiti ambe ka ambe enga no sésiika” (EBREU 5:14).

“¿Para ambeksĭ uékasĭni úrani selularini ma chaari sapiicha? ¿Nénaksĭ úrasĭni *chaarini* engajtsĭ kuánetaajka? ¿Náki pájinarhuksĭ inchasĭni internetirhu? ¿Ambeksĭ ch'anasĭni? ¿Na xánkxsĭ íóni úrasĭni? Ante de íntskuni selulari ma chaari sapiichani, ts'éjkua je náksĭ xáni eratsekua jukariskia ka sinksĭ jorhenguarhiskia p'íngukuarhini”.



LAURETA KA IMEERI  
UÁMBA, DAVID

NÉNA NO SÉSI ÚKUSĪNI SELULARI

# CHAARI TEMUNGURHIRIKUANI

Engaksī sési úranhaska, selularichaksī úsīndi jarhuaipeni parakaksī temungurhiricha sánderu sési pájpераака. Pori ejemplu, úsīndiksī uandajperani na engaksī jatini uékaaka.

Joperu engaksī no sési úraska, uatiksī arini problemechani jatsiani:

- Nóksī tiempu jatsini paraksī márku jarhani.
- Jukariksī áchikuarhini nájkiruka no xáni uétarhiaka.
- Nóteruksī mintsinharperania ka astaksī niárani máteru nema jingoni jámani.





## AMBE ENGAJTSĪ JATSIKA PARA MĪTENI

### NA ENGAJTSĪ XĀNI TIEMPU MÁRKU JARHAJKA

Acheeti ma enga Michael arhinhajka uandasīdi: “Ménichani engachi máрку jarhajka juchiiti uarhiiti jingoni, ísisindi enajki ima no jima jarhajki. Ima telefonunku exeni jarhasīdi ka uandasīdi: ‘Ai, tekaa-chintarini, joperuni no úspka mensajichani arhiantani asta iáiasī’”. Jonathani enga ístu tembuchatini jaka ístu uandasīdi eska ménichani “temungurhiri ma uaaka máрку jarhani nani, joperuksī ísī p’iku-arherani enajkiksī iauanichani jaki tsimarhani”.

**ERATSI JE ARINI AMBE:** ¿Namuni xanharichi no úsīni máрку jarhani temungurhiri jimbokajtsīni nema uandajpasīnga o mensaji ma axacheni? (EFESU 5:33).

### ÁNCHIKUARHITA

Máru k’uiripuechaksī jatsisīdi para jurhiakua ka chúrikua erokuarhini jarhani eskaksī uandajpanhaaka ánychikuarhitarhu uératini. Máteruechaksī jamberi no xāni kánikua tiempu ánychikuarhijti, peru engaksī na niántajkia imeo, seguirinksī jarhasīdi ánychikuarhini. Acheeti ma enga Lee arhinhajka, uandantasīdi: “Jiáni engani arhutajka tiempu parani juchiiti uarhiiti jingoni jarhani, úkua jukanchasīnga parani no exeani jarhani ánychikuarhitarhu anapu iamadechani ka mensajichani”. Ka uarhiiti ma enga Joy arhinhajka uandasīdi: “Juchiini uératini ánychikuarhis-

īnga ka úkua jukanchasīnga sésku ánychikuarhini, jimbokani uékani jarhasīnga sánderu ánychikuarhini”.

**ERATSI JE ARINI AMBE:** Engaksīni chaari uámba o témba uandontskuarhechini jarhajka, ¿jingontkujtsī kurhajchani jarhasīni? (LUKASA 8:18).

### ¿NÉNA ÚPIRINI SELULARI PELIGRU MÁENI PARA TEMUNGURHIRICHA?

Exenhasti eskaksī uánikua temungurhiricha arhirperasīnga, jimbokaksī no mintsinharperasīnga ambe enga máteru karhatajka redesi sosialicharhu. Ka 10% ima k’uiripuecheri engaksī íri ambe kurhamarhinhapka, jiókuarhisptiksī eskaksī karhataska redesi sosialicharhu ambe ma enga imeecheri témba o uámba no mítepka.

No ískusī uandanhajti eskaksī redesi sosialicha kánikua peligrosueska para temungurhiricha ka eska asta úsīnga eskaksī ísku jándikua ambe niátaaka. Ísī jimbo, nójtsīni ísku pakatasīdi engaksī máru abogaduecha engaksī diborsiueri ambe exejka, uandajka eskaksī redesi sosialicha jimbo uánikua temungurhiricha jurajperasīnga.

**ERATSI JE ARINI AMBE:** ¿Jískasīntsī ambe engajtsī karakujka máteru nemani enga no chaari uarhitiriuaka o acheetini? (PROVERBIOS 4:23).

## AMBE ENGAJTSĪ UAAKA ÚNI

### EXE JE AMBE ENGA SÁNDERU JUKAPARHAKUA AMBEEKA

Nema enga no sési t'irejka niáraati p'amen-chani. Sáno májkueni, ima temungurhiri enga no káni p'indejka márku jarhani, niáraati problemechani jatsiani (Efesu 5:28, 29).

**BIBLIERI KARAKATA:** Exe je “ambe enga sánderu ambakitiika [o jukaparhakueni]” (FILIPUSA 1:10).

Temungurhiri exe je náki konsejuechantsĭ uékapirini ísí úni o kara je ambejtsĭ uékapirini úni parajtsĭ no jatsiani problemechani selulari jimbo.

- ☐ Májku k'éri t'ireni sikiera ma xanhari ma jurhiatikua jimbo.
- ☐ Exeni káni engajtsĭ uaaka no úrani selularini.
- ☐ Májku k'éri úni ambe ma engajtsĭ tsimarhani tsitiaka.
- ☐ Pátani selularini chúrikuechani ka no jimeesísĭ jatsini engajtsĭ uaaka sóntku p'íkuni.
- ☐ Arhutani 15 minutu parajtsĭ temungurhiri uandontskuarheni ka no jurajkuni eskaksĭni iamadecha o mensajicha ójkutaaka.
- ☐ Uandani na engajtsĭ xáni tiempu úraaka internetini.
- ☐ \_\_\_\_\_
- ☐ \_\_\_\_\_
- ☐ \_\_\_\_\_

## AMBE ENGAKSĪ TEMUNGURHIRICHA UAAKA MÁRKU EXENI

Engajtsĭ na jandiajku exeauakia ini kurhamarhikuechani, uandontskuarhi je temungurhiri íri ambe.

- ¿Nénajtsĭ uaa úrani selularini parajtsĭ *sánderu sési pájperani* temungurhiri?
- ¿Na xáńksĭni úpirini ójkutani selulari parajtsĭ no májku k'éri jarhani temungurhiri?
- ¿Ambejtsĭ tsitipirini eska sánderu sési úkuarhipiringa?
- ¿Úkuajtsĭ jukanchasĭni no exeni jarhani áńchikuarhitarhu anapu ambe engajtsĭ na niántajkia k'umanchikuarhu? ¿Na uandasĭni chaari acheeti o uarhiiti íri ambe?
- ¿Nénajtsĭ uaa xarhatani eskajtsĭ kurhangusĭnga na enga xáni tiempu uaaka jarhani cháńksĭni jingoni chaari acheeti o chaari uarhiiti?

**BIBLIERI KARAKATA:** “Asĭ nema jirinhakuarhie solu indeni ambe enga para imajkumindu sési uéraaka sino ambe enga jarhuataaka máteruntu” (1 KORINTU 10:24).

“Ji k'umanchikuarhu áńchikuarhisĭnga, peru-  
ni jatsikusĭnga ora ma na engani jandora  
k'amaraaka áńchikuarhini. Ístuni jima pee-  
rakusĭnga selularini paraka no kúskani  
jauaka engareni korreu ma niáracheaka,  
ísĭ úsĭnga úrani selularini parani ora exeni  
ka nóteruni exenia áńchikuarhitarhu anapu  
ambe”.



JASON KA IMEERI  
TÉMBA, ALEXANDRA




NÉNA NO SÉSI ÚKUSĪNI SELULARI

# CHAARI ERATSEKUANI

K'uiripuechachi méntkisi jorhengarhini jarhasinga ambe ma: engachi eskuelarhu jarhajka o ánychikuarhitarhu ka engachi máteru ambe úni jarhajka. Ka selulari ambe jarhuajpesindi para ma úni sánderu ambe jorhengarhini. No méni xáni fásilispti juchaari k'umanchikuarhu exentani xáni kánikua informasioni.

Peru k'uiripuecha engaksí jukari úrajka selularini uatiksí arini problemechani jatsiani:

- Úkuaksí jukanchasíndi kurhanguni ambe engaksí arhintani jarhajka.
- Nóksí úsíndi májku ambe úni.
- Sóntkuksí kuatantasíndi engaksí jandiajku jarhajka.





## AMBE ENGAJTSĪ JATSIKA PARA MĪTENI

### ENGAKSĪ ARHINTANI JARHAJKA

Máru k'uiripuechaksī sóntku arhintasīndi ambe ma enbesi de iatsitakuarhu paraksī úni kurhanguni ambe engaksī arhintajka.

Jirejiresī arhintani ambe ma, marhuasīndi para sóntku exentani mókuntskua kurhamarhikueri ma. Joperu no marhuasīndi enga ma jatsijka para sési kurhanguni ambe enga arhintani jarhajka.

**ERATSĪ JE ARINI AMBE:** ¿Úkuajtsī jukanchasīni arhintani tekstu ma enga kánikua k'éjka? ¿Andijtsīsī exejki eska jánguarhintani ísī úni jarhuatakaksīni parajtsī sánderu ambe mīteni? (PROVERBIOS 18:15).

### NO ÚNI MÁJKU AMBE ÚNI

Máru k'uiripuechaksī eratsesīndi eska selulari jimbo, uaakaksī uánikua ambe úni májku tiempu jimbo: porí ejemplu, mensajichani axakuani amiguechani ka ístu estudiarini jarhani. Joperu enga ma no jingontku úska ambe ma ka sánderia enga uétarhiaka eska sési uaaka, tátsekua *no ma ambe* sési uérasīndi.

Jingontku úni ambe ma, kánikua marhuasīndi ka para úni ísī úni uétarhisīndi p'íngukuarhini. Uátsī ma enga Grace arhinhajka uandasīndi: “Engari jingontku úska ambe ma, sánderu sési uéra-

sīndi ka nóri xáni uandanhiani jarhasīnga. Kuenta íntskukuarheska eska sánderu sésiska ma ambejku úni jarhani ka eska uánikua ambe májku tiempu jimbo”.

**ERATSĪ JE ARINI AMBE:** Engajtsī uánikua ambe újka májku tiempu jimbo, ¿nójtīsī úni jarhasīni kurhanguni ka ni miántani ambe engajtsī jorhenguarhijka? (PROVERBIOS 17:24).

### ENGA MA JANDIAJKU JARHAJKA

Máru k'uiripuechaksī no tsitisīndi jandiajku jarhani ka jimboksīsī úrajti selularini paraksī no jandiajku p'íkua-rherani. Uarhiiti ma enga Olivia arhinhajka uandasīndi: “Jimbokani kuatantasinga, no úsinga ni sikiera 15 minutu jurajkuni juchiiti telefonuni, *tabletani* o no étskuntani teleni”.

Joperu iáminduecha, tumbiicha ka k'ératicha, uétarhinchasingachi ménichanisī jandiajku jarhani parachi úni eratsentani ambe engachi jorhenguarhijka. I ambe kánikua jukaparhakuesti parachi úni jorhenguarhini ambe ma.

**ERATSĪ JE ARINI AMBE:** ¿Sésijtsī úrasīni imani tiempuni engajtsī jandiajku jarhajka para eratsentani? (1 TIMOTEO 4:15).

## AMBE ENGAJTSĨ UAAKA ÚNI

### ERATSENTA JE NA ENGAJTSĨ ÚRAJKA SELULARINI

¿Nénaksĩni uaa jarhuatani selulari parajtsĩ sánderu sési jorhenguarihini ambe ma? ¿Ka nénaksĩni uaa ójkutani engajtsĩ jorhenguarihini jauaka ambe ma?

**BIBLIERI KARAKATA:** “Kuájchaku jánhaskakuani ka eratsekuani” (PROVERBIOS 3:21).

### KURHAMARHIKUARI JE:

- ¿Úkua jukanchasĩni jingontkuni arhintani pantaiarhu tekstu ma engá k'éka? Ka engá isĩika, ¿amberini ójkutasĩni?

- ¿Ambe uaa úni parareni no ma ambe ójkutani?

**Konseju:** Ueena je imani tekstuechani arhiantani engaksĩ no xáni k'éra ka tátsekua sánhani arhi je tekstuechani arhiantani engaksĩ sánderu k'éra. Bosi alta jimbo arhintsĩ je, peru no xáni uinhachaparini parakajtsĩ uaka kurhanguni ambe engajtsĩ arhintaaka.

- ¿Ambe uaa úni parani tiempu jatsini ka úni sési eratsentani imani ambe engani arhintajka?

**Konseju:** Engajtsĩ estudiarini jauaka, arhuta je 10 minutu parajtsĩ eratsentani imani ambe engajtsĩ jorhenguarihika.

- ¿Káni sánderuni úkua jukanchasĩni jingontkuni jarhani?

- ¿Ambe uaa úni parani májku ambe úni?

**Konseju:** Parajtsĩ no uánikua ambe úni májku tiempu jimbo, kéndita je iámindu ambe engaksĩni uaka ójkutani jima engajtsĩ estudiariuaka.

**BIBLIERI KARAKATA:** “Jirinha mímíxekua, jirinha jánhaskakua” (PROVERBIOS 4:5).

## SÁNDERU INFORMASIONI JW.ORG JIMBO

¿Náki ari amberi uékapirintsĩ sánderu ambe míteni?



### Néna sánderu sési irekani familia jingoni

Exe je rebistani “12 ambe enga uétarhijka paraka familia ma sési irekaaka”.



### Néna jorhendaani ambakiti ambe sapiichani

Exe je bideuni “¿Nori úsini jurajkuni chíti selularini o tabletani?”.



### Néna no xáni uandanhiani ambe enga úkuarhiaka sánderu orhepani

Exe je artikuluni “Ambe enga jurhimbít-kueka ima amberi enga sánderu orhepani úkuarhiaka”.

Bibliaksĩni uaati jarhuatani chánkisini ka chaari familiani parajtsĩ sési irekani iásĩ ka parajtsĩ ambakiti ambe níarani jatsini sánderu orhepatini.

No jamberi kuenta  
íntskukuarheparini, selulari  
uaati sánhani arhini no sési  
úkuani k'uiripuechani ka imani  
ambe jingoni engaksĩ imeecha  
no eranhaskajka.

Na engajtsĩ pájperajka  
máteruecha jingoni

Chaari sapiichani

Chaari temungurhirikuani

Chaari eratsekuani

